

## Capitulu 4

Induve Tistù hè mandatu à a scola,  
ma ci stà pocu

Sin' à l'età d'ottu anni, Tistù ignorò a scola. A signora Mamma, in fatti, avia preferitu principià da per ella a struzzione di u so figliolu è insegnà li i rudimenti di a lettura, di a scrittura è di u calculu. I risultati, ci vole à ricunnosce la, ùn eranu pessimi. Per via di e bellissime figure cumprate apposta, a lettera « A » s'era stallata in lu capu di Tistù sottu à a figura d'un Asinu, poi d'una tarraghjola\* poi d'una Acula ; a lettera « B » sottu à a forma d'una Balla, d'una Buccia, d'un Ballò e cetera. Per u calculu, si ghjuvava omu di rundinelle poste à nantu à i fili eletrichi. Tistù avia amparatu non solu à addizionà o à suttrae, ma ghjunghjia dinù à divide, per esempiu, sette rundinelle per dui fili... ciò ch'è face trè rundinelle è mezu per filu. Ma cumu faria per tene una meza-rundinella à

---

\* alouette

nantu à un filu elettricu, què hè un altru affare chì tutti i calculi di u mondu ùn anu mai riesciutu à spiecà !

Quandu chì Tistù ghjunse à u so ottesimu anniversariu, a Signora Mamma cunsiderò chì l'affare era fattu, è ch'ellu ci vulia à cunfidà à Tistù à un veru profussore.

Omu cumprò à Tistù un bellissimu scursale à quadretti, buttucchie nove chì li stringhjanu i pedi, una cartina, un porta penna neru decoratu di persunagi sgiappunesi, un quaternu incù e linee grande, un quaternu incù e linee chjuce, è si fece cunduce da u servu Carolus à a scola di Mirepoil chì avia una bella fama.

Pensavanu tutti chì stu zitellu cusì ben vitutu, chì avia genitori cusì belli è cusì ricchi, è chì sapia digià divide e rundinelle pè meità è pè quartu, pensavanu tutti chì stu zitellu fessi meraviglie in scola.

Peccatu ! A scola ebbi un effettu inaspettatu è calamitosu nantu à Tistù.

Quand'ella s'apria a fila loscia di e lettere chì viaghjanu à u passu nantu à u tavulone neru, quand'ella principiava à sbucinà si a longa ca-

tena di i trè volte trè, cinque volte cinque, sette volte sette, à Tistù li venia una pizzicata ind'è l'ochju di manca è si ne falava in un sonnu prufundu.

È puru, ùn era nè baullu, nè corciu nè mancu stancu. Era pienu di bona voluntà.

« Ùn vogliu micca dorme, ùn vogliu micca dorme » si dicia Tistù.

Avvitava i so ochji à u tavulone, incullava e so arechje à a voce di u maestru. Ma sentia vene sta pizzicata... Pruvava di luttà à tutti patti contru à u sonnu. Si cantava sottu voce una bellissima canzona ch'ellu avia inventatu :

*Un quartu di rundinella,  
Sarà azampa, Sarà l'ala,  
Sella era una torta,  
A tagliaria in quattru...*

Un c'era nunda à fà. A voce di u maestru si mutava in nanna ; facia notte nantu à u tavulone neru ; u suffittu sussurava à Tistù : « e o, per quindi i belli sonnii, e o » è a scola di Mirepoil diventava a scola di i sonnii.

- Tistù ! mughjava d'un colpu u maestru.
- Un l'aghju micca fatta apposta, o maè, rispundia Tistù discitatu in trasaltu.
- Un vole dì. Ripetite ciò chè aghju dettu !
- Sei torte... divise per duie rundinelle..
- Zeru !

U primu ghjornu di scola, Tistù rientrò in casa soia e stacche piene di zeri.

U secondu ghjornu, ricevì in punizione duie ore di ritenuta, vale à dì ch'ellu si ne firmò duie ore di più à dorme in scola.

A sera di u terzu ghjornu, u maestru, rimesse à Tistù una lettera per u so babbu.

Indù sta lettera, u Sgiò Babbu ebbe u dolore di leghje ste parulle :

*Signore, u vostru figliolu ùn hè micca cum'è  
tuttu u mondu. Ci ferma impossibile di tene lu.*

A scola rimandava Tistù à i so genitori.